

## **O'ZBEKISTONDA MUZEYLAR TARIXI**

**Annaeva Zarifa Musurmonqulovna**

Termiz davlat universiteti Jahon tarixi kafedrası dotsenti

**Madieva Maftuna Chori qizi**

Termiz davlat universiteti tarix fakulteti 4-kurs talabasi

<https://doi.org/10.5281/zenodo.15541529>

**Annotatsiya:** Ushbu maqolada Vatanimiz ijtimoiy hayotidagi o'zgarishlar, yangilanishlar qatorida O'zbekiston hududidagi muzeylar faoliyatidagi yangi davr haqida ma'lumot beradi.

**Kalit so'zlar:** mustaqillik, iqtisodiy, siyosiy, madaniy, meros, o'tmish, muzey, ma'rifiy.

O'zbekistonning mustaqillikka erishishi iqtisodiy va siyosiy hayotning barcha jabhalarida bo'lganidek madaniy sohada, shu jumladan, boy o'tmish merosimizni o'rganish, saqlash va uni keng xalq ommasiga targ'ib etish borasida ham tub burilish yasadi. Vatanimiz ijtimoiy hayotidagi o'zgarishlar, yangilanishlar qatorida O'zbekiston hududidagi muzeylar faoliyatida ham yangi davr boshlandi.

Mamlakatimizdagi muzeylar faoliyatini qo'llab-quvvatlash, ularning marketing siyosati va xizmatlar sohasini kompleks rivojlantirish, muzeylarga innovatsion texnologiyalarni samarali qo'llash, shuningdek, muzeylarda o'zbek xalqi va davlatchiligi tarixi, Birinchi va Ikkinchi Renessans davrlari, buyuk allomalar hayoti va faoliyatiga oid zamonaviy yangi ekspozitsiyalarni yaratish, muzey to'plamlaridagi boy tarixiy va madaniy merosimizni keng targ'ib qilish maqsadida O'zbekiston Respublikasi Prezidentining 2022 yil 27 maydagi PQ-261-sonli "Muzeylarda xizmatlar sohasini rivojlantirish chora-tadbirlari to'g'risida" qarori qabul qilindi.

Bugungi kunda respublikamiz hududidagi turli muassasalar, korxonalar, qurilish tashkilotlari, qishloq, jamoa boshqaruv xo'jaliklari qoshida, shahar, tuman, viloyat markazlarida, xalq ta'limi tizimida jami 1200 dan ortiq muzeylar bo'lib, ularning eng yiriklari poytaxtda joylashgan. Shu bilan birgalikda o'nlab yozuvchilar, shoirlar, rassomlar, olimlar va mashhur san'at arboblarning uy muzeylari ham faoliyat ko'rsatmoqda.

Muzeylar madaniy-ma'rifiy muassasa hisoblanib, uning vazifasi tarixiy hujjatlar, madaniy va ma'naviy yodgorliklarni to'plash, tabiiy boyliklardan namunalar jamlash va saqlash, ularni ilmiy jihatdan o'rganib ko'rgazmalarga qo'yish va keng xalq ommasiga havola qilishdan iborat. Muzeylar aholining keng tabaqalari o'rtasida madaniy-ma'rifiy ishlarni olib boradi. Muzeylar faoliyati xalqning tarixiy taraqqiyot jarayonida rivojlanib borishi, qo'lga kiritgan yutuqlari hamda qoldirgan boy madaniy-ma'naviy merosi xususida juda katta bilimlar beradi. Muzeylar madaniy-ma'rifiy muassasa sifatida ommaning ijtimoiy ehtiyojlarini qondirish, ularni ma'naviy kamolotga yetkazishning eng yetakchi vositalaridan hisoblanadi.

Respublikamizda yangi-yangi muzeylarning tashkil etilishi, poytaxtdagi eng yirik va nufuzli Temuriylar davri tarixi, Qatag'on qurbonlari xotirasi, mamlakatimiz janubida joylashgan Termiz shahridagi Arxeologiya muzeyining ochilishi hukumatimiz tomonidan muzey va muzeyshunoslik sohasida nihoyatda katta ishlarning amalga oshirilayotganidan dalolat beradi. Yangi muzeylarning tashkil etilishi bilan bir qatorda shu vaqtgacha ham faoliyat ko'rsatib turgan barcha katta-kichik muzeylar faoliyatini tubdan yaxshilash, milliy istiqlool ruhida qayta tashkil

etish masalasiga ham alohida e'tibor bilan qaralmoqda. Jumladan, O'zbekiston tarixi muzeyining qaytadan ochilishi, muzey ekspozitsiya zallarining yangi loyiha va rejalar asosida jihozlanishi fikrimizning yorqin dalilidir. Barcha viloyat hududlarida joylashgan boshqa muzeylar faoliyatida ham yangilanish, yaxshilanish sari qadam qo'yilayotgani sezilib turibdi. Chunki muzeylar shu kunning dolzarb muammolaridan biri bo'lgan har tomonlama rivojlangan, ma'naviy yetuk, komil inson tarbiyasida o'ziga xos alohida o'rin tutadi.

Muzeylarda saqlab, namoyish etilayotgan tarixiy hujjat va xalq madaniyatiga oid ashyolar yangi avlodga ajdodlari o'tmishi, hayoti, yuksak ma'naviyatidan darak berib, uning vositasida Vatanga bo'lgan muhabbat, ota-bobolari qoldirgan madaniy merosga nisbatan hurmat, e'zoz, ularga munosib vorislar bo'lish tuyg'usini uyg'otadi. Shuningdek, yoshlarni odobu axloqqa, halolligiga poklikka, botirlikka, mardlik, vatanni himoya qilish, ajdodlaridek mohir, sabr-qanoatli, aqlli, adolatli, haqgo'y, mehr-muruvvatli bo'lishga chaqiradi. Madaniy merosimizni har tomonlama o'rganish jamiyatimiz kelajagi bo'lgan yigit va qizlarda milliy g'ururning, milliy iftixor tuyg'usining shakllanish jarayonini amalga oshiradi.

Muzeylar faoliyatini yaqindan o'rganish, ularning mazmun va ma'no jihatdan rang-barang turlarini ajrata bilish, xalq ommasi orasida keng targ'ib etishning xilma-xil usullarini joriy qilish "Muзейshunoslik" degan keng bir sohaning vazifalaridan hisoblanadi.

Surxondaryo viloyati o'lkashunoslik muzeyi. Mazkur ziyo maskani mamlakatimizdagi keksa madaniyat muassasalaridan biri bo'lib, 1933 yili Termiz shahrida Surxondaryo tumanlararo Davlat muzeyini tashkil etish to'g'risidagi qaror doirasida tashkil etilgan.

Muzey dastavval «Surxondaryo viloyati yutuqlar ko'rgazmasi» deb atalgan bo'lsa 1933 yil 7 noyabrdan boshlab «Termiz shahridagi Surxondaryo davlat tumanlararo muzeyi» deb nomlandi.

Viloyat o'lkashunoslik muzeyi katta taraqqiyot yo'lini bosib o'tganligini ko'ramiz. Mazkur dargoh G.V.Parfyonov, R.F.Fayozov, I.T.Botirov singari taniqli tarixchilar rahbarligi davrida ayniqsa katta e'tibor qozondi. Ular o'z davrida muzeyning tashkiliy, moddiy, texnikaviy, ilmiy-uslubiy jihatdan mustaxkamlashda katta hissa qo'shdilar. Muzey ilmiy xodimlarining uzoq yillar davomida olib borgan ilmiy tekshirish ishlari natijasida o'lkamizda insoniyat jamiyati taraqqiyotining birinchi moddiy-madaniyat yodgorliklari o'rganildi. Olib borilgan tadqiqot ishlari natijasi jahon qadimshunoslik fanini yangidan-yangi ma'lumotlar bilan boyitdi.

Surxondaryo viloyati o'lkashunoslik muzeyi uzoq yillar davomida xalqimizning boy ma'naviy me'rosini namoyon etishda, yosh avlod vakillarini shonli tariximiz, o'lkamizning rang-barang flora va fauna dunyosi bilan tanishtirishda, vatanparvarlik ruhida tarbiyalashda muhim ahamiyat kasb etayotganligi yanada e'tiborlidir.

## REFERENCES

1. Sh.Mirziyoyev erkin va farovon, demokratik O'zbekiston davlatini birgalikda barpo etamiz. Toshkent –"O'zbekiston" -2016.56 B.
2. 2017-2021 yillarda O'zbekiston Respublikasini rivojlantirishning beshta ustuvor yo'nalishi bo'yicha Harakatlar strategiyasi. O'zbekiston Respublikasi Prezidentining 2017 yil 7 fevraldagi PF-4947 sonli Farmoni.
3. Kuryazova D.T. O'zbekistonda muzey ishi tarixi. — T.: San'at, 2010.

4. Ganiyeva Ch.X. Muzeyshunoslik. O‘quv qo‘llanma. Andijon, 2024. 464 b.
5. Rahmonov, M. (2025). PANJOB–QADRIYATLAR SAQLANIB QOLGAN TOG ‘BAG ‘RIDAGI MO ‘JIZA. *Modern Science and Research*, 4(5).
6. Habibullo o‘g‘li, RM (2024). SURXON VOHASI AHOLISINING AN'ANAVIY KIIYIMLARI VA TAQINCHOQLARI.
7. Rahmonov, M. (2024). SURXON VOHASI TOQCHI QAVMI AHOLISIORASIDA XALQ AMALIY BEZAK SAN'ATI RIVOJLANISHI. *Zamonaviy fan va tadqiqotlar* , 3 (7).